

觀心十法界圖說

佛學小叢書

(要彙)


卷九

上海佛學書局印行

觀心十法界圖

若人欲了知

應觀法界性



三世一切佛

一切惟心造

修觀之道。曰從行。曰附法。曰託事。唯三而已。今觀心圖者。從行之正軌也。準夫止觀二十五法爲方便十乘十境爲正修者。固非於此能備。若其日用之際。以十界德過升沉。鑑我心曲。雖絲髮不能自逃。其遷善改過之要乎。慈雲法師示我以觀心之圖。研味法喜。心乎不忘。置諸座隅。足以自警。而未見兼人之益。乃復命工形諸篆刻。用廣流行。庶幾乎仰承於師志也。

皇宋天聖元年九月既望太原王欽若序

觀心十法界圖說

天竺慈雲大師述

其廣不可涯。高不可蓋。長不可尋。將盈而虛。將晦而明。雖邊而中。微妙深絕。叵得而思議者。惟心也。天台師聞之於靈山。證之於三昧。知其寂默。非數所求。而強以數。數於非數。依法華作十界百界三千權實。以明諸性。非合也。非散也。自然而然。曰諸法實相。使人易領也。然後示之一念空。三千皆空。一念假。三千皆假。一念中。三千皆中。成圓三觀。觀圓三諦。以明諸修。大智也。大行也。不運而速。曰白牛大事。使人頓入也。故得自因至果。不移一念。坐道場。成正覺。降魔說法。度衆生。入涅槃。而能事畢矣。用龍樹偈。因緣卽空卽

假卽中。會而同之。十法界者何也。十統諸法也。三諦爲界也。何者。謂佛以中爲法界者也。菩薩以俗爲法界者也。緣覺聲聞同以空爲法界者也。地獄鬼畜修羅人天同以因緣生法爲法界者也。空假中者。雖三而一也。十界者。亦一而十也。故使互含。一復具九。如帝珠交映。成百法界也。一因緣。一切因緣。一空。一切空。一假。一切假。一中。一切中。良由於此三千者。復何謂也。成界之法者也。有其十。謂如是相。如是性。如是體。如是力。如是作。如是因。如是緣。如是果。如是報。如是本末究竟等。斯總也。十法在佛。爲中。爲實。爲常。爲三智。爲五眼。爲十力。爲四無畏。爲不共法。在菩薩。爲假。爲權。爲榮。

爲常。爲萬行。爲四攝。在二乘。爲空。爲權。爲三脫。爲四枯。爲無漏。爲涅槃。在凡夫。爲倒。爲惑。爲漏。爲蓋。爲纏。爲集惱。爲生死。斯別也。統彼百界。乃成千法。復播諸百界。爲三世間。成三千法耳。百界三千一也。與夫一念。非前後也。非相合也。統之有宗。會之有元。必歸乎不思議三諦。無量三法。三德密藏矣。噫。一念心法。旣然引而同之。彼彼佛法。彼彼衆生法。咸然也。經曰。如心佛亦爾。如佛衆生然。心佛及衆生。是三無差別。斯之謂歟。旣知是已。當觀日用。凡起一念。必屬一界。卽照此界。爲九爲佛。九則隨情偏起。謂之無明。佛則稱理圓觀。謂之大慧。九界之念。并非佛界之心。方是是非鑑矣。非則

照之令是。是則護令成行。經曰。諸佛解脫。當於衆生心行中求。行於非道。能達佛道。斯之謂也。然則目雖在面。反臨鑑以正容。心實由中。要藉緣以熏慮。神靈潛密。照之或難。識想紛馳。檢之非易。故今引心於外。繪彼升沉之像。存志於中。觀我是非之變。然後策心內照。正道由明。題爲圓頓觀心十法界圖。於一心字。派出十界。復引墨迭貫。方之聯珠。表一法界。展轉具九。成百法界。仍以日起行相。書之左右。覽者欲深於性。請詳諸序。欲熟於修。當觀諸圖狀。佛界。若人因讀圓滿修多羅。及聞善知識所說。起淨信心。信已一念三道之性。卽三德性。苦道卽法身。煩惱卽般若。結業卽解脫。法

身究竟。般若清淨。解脫自在。一究竟。一切究竟。般若解脫亦究竟。
一清淨。一切清淨。法身解脫亦清淨。一自在。一切自在。法身般若
亦自在。卽一而三。卽三而一。非縱非橫。亦非一異。法身常住。餘亦
常住。樂我淨亦如是。是則常樂四德。祕密之藏。徧一切處。一切諸
法。悉是佛法。旣信是已。以境繫心。以心繫境。心境念念相續不斷。
必見法性。設未相應。當依一實無作四諦。起四大誓。無可求中。吾
故求之。依前苦道。卽苦諦。發一誓願。未度者。令度。煩惱及業。卽集
諦。發一誓願。未解者。令解。苦道。卽法身。卽是滅諦。發一誓願。未涅
槃者。令得涅槃。煩惱。卽菩提。卽是道諦。發一誓願。未安者。令安。四

宏不入。當巧安心。如是次第。具修十法。必入五品六根及分證位。
名佛法界。

菩薩界。若觀根塵一念。爲迷解本。迷故則有十界苦集。悟故則有
四聖道滅。緣此無量四諦起無量誓願。未度者令度。未解者令解。
未安者令安。未涅槃者。令得涅槃。善巧度生。慈眼視物。所集福業。
與衆生共。如是起一念者。名菩薩法界。

緣覺界。若根塵念起。則了之。從無明生。生故有行。行招名色。乃至
老死。三世相續如舞火輪。因緣本空。幻化不實。求自然慧。樂獨善
寂。觀空心重。耽住寂定。雖得道果。不慕化人。復有觀物榮落。悟世

非常。聞空得道。名爲獨覺。如是行者。名緣覺法界。

聲聞界。若根塵因緣。隨有一念。依色心故。苦由煩惱故。集。厭苦斷集。非對治如何。遂依四諦。修十六觀。三十七道品。如救頭然。由四善根。得入無漏四沙門果。證三涅槃。會偏真理。不得佛法。不慕化人。如鑾獨跳。不顧後羣。如此一念。名聲聞法界。

天界。若其念起。多忻天樂。篤其善心。希於來報。齋戒純淨。飯食沙門。造立塔寺。及佛形像。書寫大乘。濟惠貧病。於十善法。止作具修。自然成性。或關禁六根。使六情不蕩。六塵不人。得欲界禪。及色無色定。身心寂靜。三業調良。如此一念。名天法界。

人界。若其念念以五常立德。五戒修身。於國惟忠。於家惟孝。謙損居衆。中正存誠。推德於人。引咎向己。尊上恤下。給孤濟貧。慚愧是懷。慈和爲性。深信因果。崇重三寶。精修齋戒。建立塔寺。但希世樂。無升出心。貪惜自身。戀著眷屬。如此一念。名人法界。

阿修羅界。若其念念雖好修善。布施齋戒。而多猜嫌。狐疑進退。所修福業。多爲勝他。見人修善。情多嫉忌。貢高我慢。珍己輕人。欲彼歸從。不耐謙損。如鵠高飛下視。外揚仁義。內無實德。衆前談論。引長於我。不循理正。不愧賢能。如此行心。是阿修羅法界。

餓鬼界。若其念念無慚無愧。貪求無足。慳慙鄙惜。不施一毛。剋削

於人。衷歸於我。見人布施。傍起遮障。見人得利。心生熱惱。性多詭曲。常起邪見。人前正容。屏處放恣。破齋犯戒。恣貪飲食。不信罪福。不信因果。不信三寶。不孝所親。是名餓鬼法界。

畜生界。若其念念。耽湎五欲。貪多眷屬。日增月甚。而無厭足。曲理枉物。斷不以公。非法取財。動不由義。祇圖利己。不憫孤貧。明負他財。魯扈抵突。市易負直。公行劫奪。不忠不孝。無賢無愚。不信因果。不信三寶。癡騃無恥。現同畜生。是名畜生法界。

地獄界。若人親近邪惡友。及性自作惡。起增上心。念念相續。造上品十惡。謂殺盜姪。妄言綺語。兩舌惡罵。貪瞋邪見。及五逆罪。犯四

重禁。汙梵行人。沽酒醉亂。不思君父師長恩德。橫生熱惱。挫抑賢能。黨比不肖。破塔壞寺。燒毀經像。謗毀大乘。斷學般若。謗無諸佛。破戒受施。用三寶物。偷僧祇物。起於外道。斷常諸見。破正因果。三世之法。習十二種惡律儀法。一屠兒二魁劊三養猪四養雞五捕魚六獵者七網鳥八捕鱗九咒龍十獄卒十一盜賊十二爲王家捕賊及養蠶等業如上等輩。死墮阿鼻大熱大寒諸大地獄。是名地獄法界。

蕩益大師妙觀直指

梵網立義云。梵網卽衆生心性。乃諸佛之本源。行菩薩道之根本。是大衆諸佛子之根本也。自性本淨名梵。塵介含攝名網。由此心性。建立無量世界衆生之法。及設無量教門諸佛之法。故曰心佛及衆生。是三無差別。而此心性。體絕染淨。徧能出生染淨諸法。正染淨時。仍非染淨。染亦法界。淨亦法界。染淨俱不思議。乃名爲梵。所謂佛界清淨。乃至地獄清淨。卽此心性。體非同異。徧能示現同異諸相。正同異時。仍非同異。異亦法界。同亦法界。同異俱不思議。乃名爲網。所謂佛爲法界。一切法趣佛。乃至地獄爲法界。一切法

趣地獄。略而言之。夫心者不起而已。介爾有心。三千具足。謂一念心中。必具十界。於一一界。必各互含。便成百界。如此百界。各具相性。乃至本末究竟等十如。共有千如。復次實法一千。假名一千。國土一千。則成三千。實法者。地獄五陰。乃至佛界五陰。假名者。地獄假名。乃至佛界假名。國土者。地獄依報。乃至佛界依報。隨拈一法。隨舉一名。隨拈一塵。無非法界。理事頓具。無欠無餘。如一法。一切諸法亦復如是。如一名。一切諸名亦復如是。如一塵。一切諸塵亦復如是。而但云介爾有心三千具足者。以衆生太廣。佛法太高。故且令觀心。庶易悟入。只此介爾極微劣心。三千性相。炳然頓具。非

前非後。不減不增。何以故。一念體圓。名爲理具。隨起念時。卽名事造。良由介爾所起之心。於十界中。必落一界。一界旣現。九界同彰。故地獄現時。一切法趣地獄。十界無非獄界。又獄界亦能徧起十界。乃至佛界現時。一切法咸趣佛界。十界無非佛界。又佛界亦能徧起十界。法性自爾。非關強造。只因此介爾一念之心。必全攬法界以爲其體。而此法界。從來無有分劑。不可割裂。安得謂此介爾之心。止是少許法界理耶。又此介爾之心。旣全具法界之理。必全具法界之事。以此法界。從來攝一切事。罄無不盡。並無一事。如微塵許。能出法界外者。倘謂介爾心中。但具法界全理。不具法界全

事。不幾有理外之事耶。所以念體念用。同名爲心。念體則冥乎理。具而理具。還包事造。念用則屬乎事造。而事事還含理具。故此事理兩重三千。皆卽一念心中圓具。如帝網珠。光光融攝。重重無盡。難議難思。又云。如帝網明珠。光光相映。一珠中現一切珠。一切珠中一珠影。一切珠中一切珠。一珠各住一珠位。題稱梵網妙極於斯。

徹悟大師念佛指要

吾人現前一念之心。全真成妄。全妄卽真。終日不變。終日隨緣。夫不隨佛界之緣。而念佛界。便念九界。不念三乘。便念六凡。不念人